



10. oktoberi 2016

UKA2016/99

**Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiissummut ilaatinneqartut, nakorsiarneranni malitseqartitsineranut kiisalu nangittumik katsorsarneqarnerannut atatillugu allakkatigut nassuiaammik tiguisalernissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.**  
(Inatsisartunut ilaasortaq Agathe Fontain, Inuit Ataqtigiit)

Inatsisartuni ilaasortaq Agathe Fontain Inuit ataqtigiit Naalagaaffiit peqatigiit innarluutilinnut isumaqatigiissutaata atortuulersinneranut ussersornermik atuisut innuttaasullu allat attaveqarniarnermi ajornartorsiutillit pillugit saqqummissaqarpoq oqaaseqaatissarpullu imaappoq.

Innarluutillit, aammalu napparsimasut allat attaveqarniarnermi ajornartorsiutillit pitsaasumik ikiorserneqartarnissaat, kiisalu nakorsiarnermi nakorsarneqarnermiluunniit paasinartumik ikiorneqartarnissaanik saqqummiussaqrneq isumaqatigaarput.

Tassami aamma ilaatigut innarluutillit ikiorneqassappata paasisinnaasaannik kiffartuuneqarnissaat ingerlattariaqarmat. Aammalu toqqissisimanartumik innarluutillit nakorsanik ikiorneqarpata pineqartunut ilaqutaanullu toqqissisimanarnerussamat, taamaattumik siunnersuuteqartup anguniagai allakkatigut nassuiaammik nakorsarneqartut tiguisarnissaat isumaqatigalugit oqaatigissavarput.

Naalakkersuisut akissutaanni innarluutillit aammalu attaveqarnikkut ajornartorsiuteqarsinnaasunut ikiorsinissanik ingerlassaqarlutik pitsanngorsaanerat soorunami aamma nuannaarutigissallugu pissutissaqarpugut.

Inuimmi taamatut napparsimasut toqqissisimanartumik katsorsarneqarlutik ikiorneqarnissaat pingaarluinnarmat.

Kiisalu tusilartut tusagassiorfinni malinnaanissaannut ajornannginnerusumik assersuutigalugu TV-ikkut aallakaatitsinermi ussersornikkut periarfissat allanilu atugaanerulernissaat kaammattuutigaarput.

Taamatut oqaaseqarluta peqqinnissami ataatsimiititaliami suliarineqarnissaa innersuussutigaarput.

Hans Enoksen